

Kenapa Umat Islam Beku?

Soal kemunduran dan kebekuan umat-umat Islam, sering diperkatakan orang di sana-sini. Kadang-kadang berlaku tuduh-menuduh, kata-mengata kepada pihak itu, dan inilah yang menyebabkan kita jatuh, padahal sepatutnya kita tidak harus menyalahkan orang lain di atas kejatuhan kita, malah apa yang patut kita lakukan ialah mencari sebab-sebab kejatuhan kita serta menyelesaikan segala situasi dan *problem* yang menyebabkan kita jatuh. Di bawah ini beberapa sebab kebekuan dan kejatuhan umat-umat Islam di zaman ini.

(Oleh Mohan Nilam Puri Kelantan)

Sebab pertama: Menutup pintu

ijtihad serta cuai dalam mempelajari ilmu pengetahuan. Setelah jatuhnya Baghdad dalam pertengahan kurun yang ketujuh Hijrah kira-kira pada kurun ketiga belas Masihi, berikutan dengan terhentinya kegiatan ilmu pengetahuan serta tamadun-tamadun Arab seluruhnya.

Kedua ini adalah berpunca dari penutupan pintu ijtihad yang dilakukan oleh fuqahā' *ahl al-Sunnah*, mereka ini merasa cukup dan berpuas hati dengan apa yang telah dihidangkan oleh Hanafī, Mālikī, Shāfi‘ī dan Ḥanbalī. Sejak ini terhentilah pemikiran umat Islam dan berleluasalah penyakit bertaqlid buta seterusnya bermulalah zaman kebekuan dalam setiap jurusan ilmu pengetahuan Islam.

Sungguhpun pintu ijtihad ini ditentang hebat oleh golongan Syiah serta setengah-setengah golongan ulama *ahl al-Sunnah* sendiri, seperti Taqī al-Dīn bin Taymiyyah, Ibn al-Qayyim al-Jawziyyah kemudiannya ditentang oleh angkatan baru dalam Islam umpama: Muhammad bin

Abdul Wahāb, Jamāl al-Dīn al-Afghānī dan Syeikh Muhammad Abduh, seterusnya seluruh ulama-ulama ahli-ahli Fiqah, terutama Imam Shawkānī telah menentang mereka serta menegaskan (dengan alasan-alasan dari kitab, sunnah, *ijmā‘* dan *qiyās*) bahawa pintu ijtihad bukan sahaja terbuka malahan wajib, ke atas mereka-mereka yang bersifat dengan sifat-sifat ijtihad, dan Imam Ahmad Ḥanbalī sendiri pernah berkata “**Jangan meniru ku juga Mālikī, Shāfi‘ī serta al-Thawrī malah ambillah dari mana mereka-mereka ini ambil”.**

Walau bagaimana penentangan terhadap mereka-mereka yang menutup pintu ijtihad dan kesilapan-kesilapan mereka telah didedahkan dengan dalil yang kuat, namun mereka ini tidak sanggup keluar dari batas-batas lingkungan yang telah dibuat oleh imam mujtahid yang lampau mereka tidak mahu lagi berusaha berpegang dengan nas-nas al-Qur’ān dan hadith, mereka berpegang begitu kuat dengan perkataan imam-imam mereka, sehingga Abu al-Hassan al-Karkhī dari ulama Hanafī berkata: “**Tiap-tiap ayat-ayat Qur’ān atau hadith yang menyalahi pegangan sahabat-sahabat kita,**

adalah dianggap pasti dita’wīl atau dimansūkh” Tindakan seumpama inilah menyebabkan terhentinya segala kegiatan umat Islam dalam setiap segi. Berhubung dengan ilmu pengetahuan pula, kita umat Islam tidak begitu mengambil berat terhadapnya pada hal di dalam al-Qur’ān Tuhan telah menegaskan kira-kira begini “**Kata olehmu, wahai Tuhanku tambahilah aku dengan ilmu pengetahuan.**” Dan Junjungan kita telah bersabda “**Ada pun hikmah itu ialah barang hilang orang-orang mukmin, di mana sahaja dia berjumpanya maka dia berhak mengambilnya**” Walau bagaimana tegas nas-nas yang menunjukkan yang umat Islam mesti menyumbat dadanya dengan ilmu pengetahuan namun begitu kita masih cuai lagi, kalau pun ada, sebahagian besar umat-umat Islam masih menitik beratkan pengajian-pengajian mereka terhadap jurusan-jurusan “*Arts*” atau Seni sahaja sementara jurusan-jurusan Sains kita masih mengabai-abaikan sahaja. Kalau lahir keadaan ini berlaku terus-menerus maka sampai bila kita tidak dapat menyaingi dengan umat-umat lain di dunia ini.

Kenapa Umat Islam...?

Sebab kedua: Berpegang kepada nas-nas

yang tidak tegas. Kita tahu punca pengambilan asasi bagi perundangan Islam ialah Qur'an dan hadith. Terhadap Qur'an, tidak timbul perselisihan antara golongan-golongan dalam Islam sebagaimana berlakunya perselisihan terhadap penerimaan hadith, sebab al-Qur'an telah selesai dibukukan pada zaman Uthmān bin 'Affān, sementara hadith dihimpunkan di zaman *Tabi'in*, iaitu setelah diberangsang oleh 'Umar bin Abdul Azīz. Kira-kira pada abad pertama Hijrah, kemudian usaha ini diikuti pula oleh Khalifah al-Manṣūr dalam tahun 140 Hijrah.

Sungguhpun usaha ini telah dapat mengawal hadith-hadith dari kehilangan namun hadith sebagai punca pegangan bagi seluruh umat Islam, sama ada golongan ulama atau golongan awam, seperti mana mereka sepakat menerima himpunan Qur'an. Lantaran inilah hadith-hadith ini masih menjadi perselisihan ulama serta masih belum terkawal dari ditembusi oleh hadith-hadith dusta (*mawdū'*). Dan tak kurang banyaknya hadith-hadith palsu ini telah disebarluaskan oleh golongan-golongan atau orang-orang tertentu untuk kepentingan tertentu umpama yang telah dilakukan oleh Abdullah bin Sabā' antara lainnya hadith-hadith palsu itu ialah seperti:

"Tiap-tiap nabi ada pemegang wasiat 'Alī ialah pemegang wasiat Muhammad" dan juga hadith-hadith palsu yang mencaci golongan-golongan tertentu seperti **"Akan lahir di dalam umatku**

seorang yang bernama Muhammad bin Idris,

lebih jahat dari Iblis." Dan banyaklah perkara-perkara yang seumpama ini diseludup ke dalam nas-nas yang menjadi punca pengambilan perundangan Islam yang boleh mengeliru dan memesongkan pegangan orang-orang awam Islam.

Yang ketiga: Terlu¹ Membatas Pegangan

Kepada Hukum-Hukum Cabang.

Hukum Islam yang ditegaskan di atas nas-nas Qur'an dan hadith amat sedikit jika dibandingkan dengan hukum-hukum yang dibina di atas ijtihad ulama, kerana nas-nas itu menerangkan dasar-dasar umum dan kaedah-kaedah yang meliputi (*kullī*) sedangkan hukum-hukum cawangan atau yang *detail*, sebahagian besarnya, diusahakan oleh ahli-ahli fuqahā' dengan berdasarkan *ijmā'* dan *qiyās* atau dalil-dalil yang lain.

Hukum-hukum *detail* inilah dicaduk dengan secara langsung oleh ulama-ulama yang akhir ini, seolah-olah mereka menerima peraturan-peraturan yang asasi, yang pasti mereka terima, tanpa merujuk kembali kepada dasar-dasar dan lunas-lunas yang asli. Lantaran inilah kebekuan menyelebungi ke atas perundangan Islam.

Keempat: Rasa Puak Dalam Mazhab

Hasil dari kebebasan berfikir timbulah beberapa mazhab dalam Islam, pada mulanya perselisihan berlaku antara ahli Sunnah dan Syiah dalam masalah perlantikan khalifah, kemudian *ahl al-Sunnah* terbagi pula kepada empat mazhab yaitu; ,mazhab Hanafi, Mālikī, Shāfi'i, Hanbalī, sementara Syiah terbagi pula kepada

beberapa mazhab, yang paling terkenal, ialah mazhab; Imāmī, Ismā'iīlī.

Zayidī. Seterusnya berbagai-bagai mazhab lagi telah timbul.

Sungguhpun perpecahan dan perselisihan antara mazhab-mazhab ini sebagai satu rahmat bagi umat Islam, kerana dengan ini memberi kesuburan bagi perundangan Islam mengikut irama masa, namun begitu tak kurang pula akibat-akibat buruk yang melumpuhkan kedudukan umat Islam seluruhnya, kerana di sana telah lahir pengikut-pengikut secara buta tuli yang kadang-kadang mereka terima secara mewarisi, lalu mengikat diri mereka ke dalam mazhab itu, lantas menuduh pengikut-pengikut mazhab yang lain semuanya salah. Keadaan ini membawa umat Islam ke jurang permusuhan sama sendiri, yang menyebabkan timbulnya kekacauan di dalam negara-negara Islam.

Patut juga dijelaskan bahawa perpecahan mazhab bukanlah satu keperluan dalam perundangan Islam, bahkan timbulnya itu adalah satu gejala kesulitan yang telah dialami oleh perundangan Islam. Di tengah-tengah jalan pertumbuhannya, seterusnya perpecahan mazhab ini tidak lagi perlu di zaman yang penuh dengan segala kemudahan untuk menyatukannya.

Inilah antara sebab-sebab kebekuan dan kejatuhan umat Islam secara kasar yang dapat kita katakan di sini.

Untuk mengubati keadaan ini, sudah sewajarnya bagi umat Islam membentuk sebuah **"Dewan Perundangan Dunia Islam Yang Tertinggi"**. Yang

¹ Perkataan sebenarnya ialah terlalu

Kenapa Umat Islam...?

diwakilkan oleh sarjana-sarjana perundangan dari seluruh negeri Islam, untuk menyemak dan menapis segala pendapat-pendapat sahabat-sahabat *Tābi‘īn* dan imam-imam mujtahidin dengan berdasarkan Qur'an dan hadith.

Sebuah "Dewan Perundangan Dunia Islam Yang Tertinggi" tidak mustahil lagi bagi umat Islam setelah negara-negara Islam terlepas dari cengkaman penjajahan, dan suara-suara ke arah itu pernah disuarakan oleh pemimpin-pemimpin Islam dunia, Cuma menanti saat dan ketika yang baik sahaja lagi.

Dewan Perundangan Islam peringkat negeri telah pun dilakukan

oleh kerajaan Turki, ulama-ulama Turki telah berjaya menapis fiqh Islam dari berbagai-bagai mazhab lalu membuat sebuah undang-undang "*sivil*" yang dinamakan "*Majalah al-Ahkām al-Adliyyah*" yang berjalan kuatkuasanya di negeri Turki pada tahun 1292 Hijrah.

Dan pada tahun 1920/1929/1936, Masihi kerajaan Mesir pula turut mengarah ulama-ulama besar Islam (tiga kali berturut-turut) untuk mencipta undang-undang peribadi (*Personal Law*) dan undang-undang itu telah berjaya serta berjalan dengan kuatkuasanya di negeri itu sehingga hari ini.

Usaha yang dilakukan oleh kerajaan Turki dan Mesir itu adalah satu contoh yang amat baik untuk diikuti oleh negara-negara Islam yang lain, untuk

menuju ke arah pembentukan "Dewan Perundangan Dunia Islam Yang Tertinggi" dan inilah satu-satunya harapan yang ditunggu-tunggu oleh umat Islam seluruhnya, seandainya pembentukan ini berjaya, maka sekurang-kurangnya kita dapat mempersembahkan kepada dunia sebuah undang-undang yang terbaik sekali di dunia, malah besar harapan kita, untuk mengibarkan sekali lagi bendera keamanan Islam memayungi umat manusia seluruhnya,

Punca Ambilan;

1. *Al-Thaqafah al-Islamiyah* – Muhammad

Khalif Allāh

2. *Qānūn Madnī* – Nota-nota

pelajaran

3. *Uṣūl al-Fiqah wa Tawārīkh*

al-Tashrīt – Abdul Wahab Khalīf



Toh Puan Raha, isteri Timbalan Perdana Menteri Tun Abdul Razak ditunjukkan sebuah bakul rami

Maori oleh dua orang pemandu di Yayasan Kesenian dan Pertukangan Maori di Waka Rioarioa¹, dekat Rotoros², New Zealand. Gambar ini diambil sewaktu lawatan Tun Abdul Razak dan Toh Puan Raha ke New Zealand pada bulan April yang lalu.

¹ Perkataan sebenarnya adalah Waka Rosario.

² Perkataan sebenarnya adalah Rotorua.